

Date – 28/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Chief Minister Pu Lalduhoma chuan Prime Minister hlui Dr Manmohan Singh a thihna-in a thawn thu leh a chhungte a tawrhpu thu a sawi.
2. Aizawl Traffic Police te'n tun hnai a lirthei endik runpui, No Tolerance Drive an buatsaih chhung a pawisa chawi tlingkhawm chu cheng nuai 2 sing 2 sang 6 a ni.
3. Prime Minister hlui Dr. Manmohan Singh-a chu vawiin chawhma dar 11:45-ah sorkar chawimawina sang ber (state funeral) nen vuiliam ani ang.

<><><>

CONDOLENCES

Chief Minister Pu Lalduhoma chuan Ningani zana thi ta, Prime Minister hlui Dr Manmohan Singh a thihna-in a thawn thu leh a chhungte a tawrhpu thu a sawi.

Chief Minister chuan Dr Manmohan Singh-a'n ram tana tha a thawh hnem thu sawiin ram ei leh bar hmasawna leh sorkar inrelbawlna tha siam kawngah hna ropui tak a thawk a ni a ti a. Mi fing leh ropui tak ni chung a inngaitlawm em em mihring a nih thu sawiin uiawm a tih thu Pu Lalduhoma chuan a sawi a. A chhungte a tawrhpu tak zet thu a sawi a ni.

Mizoram Pradesh Congress Committee President Pu Lal Thanzara pawhin Prime Minister hlui, Dr Manmohan Singh a ui thu nizan hmasa khan a sawi a. India ram ei leh bar dinhmunah a tha zawnga danglamna lian tak siamtu a ni a ti a. Ram hruaitu lian tak ni chung a mi thawm zawi leh inngaitlawm a nihna chu chhuan lo awm zel tur te ngaihsan a nih phah zel dawn tih sawiin a thihna chu ram tan channa nasa tak a nih thu a sawi a ni.

<><><>

POLICE STATEMENT

Kum 2024 Christmas vuakvet chhungin mipui-in halpuah leh halmawi hal chungchanga sorkar thuchhuah tha taka an zawm avang leh buaina leh harsatna awm lo tura an thawhpuina avangin Mizoram Police chuan mipui hnenah lawmthu an sawi.

IGP (Headquarters), Chief Public Relation Officer (CPRO) ni bawk Pu Lalbiakthanga Khiangte chuan nimin khan thu chhuahin mipuite'n ralmuang taka hunpui hman chhunzawm a nih theih na'n Mizoram Police-te'n theihtawp chhuah zelin, district Police Duty pangngai bakah hunpui chhunga Aizawl khawpui chhung vil turin Senior Police Officer rual, Addl. S.P atanga Selection Grade mi 12 leh Zonal Officer (Dy. S.P) mi 4 ruat an nih bawk thu a sawi a. Kumthar lo thleng turah hian Mizoram Police chuan ralmuang taka mipuite'n hun an hman theihna'n theihtawp a chhuah leh dawn a, mipuite pawh sawrkar thu zawm a, halpuah leh

halmawi lam chite hal lova tha taka Police-te thawhpui zel turin tih tak zeta an sawm thu an thuchhuah chuan a tarlang a ni.

<><><>

NO TOLERANCE DRIVE

Aizawl Traffic Police te'n tun thla ni 9 atanga lirthei endik runpui, No Tolerance Drive an buatsaih chhungin lirthei 1,359 endik a ni a, an pawisa chawi tlingkhawm chu cheng nuai 2 sing 2 sang 6 a ni.

Aizawl Traffic Police hotuten Akashvani Aizawl an hrilh danin No Tolerance Drive hman chhunga lirthei an endik zat 1,359 zinga lirthei 151 chu an man a. No Tolerance Drive kalpui tan ni, tun thla ni 9 ah lirthei 35 endik a ni a, a ni telin lirthei man hi a tam zel tih Akashvani correspondent chuan a sawi a ni.

Krismas vuakvet chhung khan Aizawl Traffic Police te chuan ngawrh takin duty an kalpui chhunzawm zel a. Krismas Uralwk Ni, ni 24 ah khan Aizawl huamchhunga lirthei khalhtu dan bawhchhia pahnih man an ni a, an pahniha an pawisa chawi belhkhawm chu cheng 5,500 a ni a. Krismas Ni leh nimin piah khan lirthei khalhtu dan bawhchhia pakhat ve ve a man bawk a ni.

<><><>

GOVERNOR

Mizoram larsap kal chhuak tur Dr. Hari Babu Kambhampati, Krismas leh kum thar chawlh hmanga Andhra Pradesh a a kal chu nimin chawhma khan Aizawlah a lokir.

Larsap hian nimin chawhma dar 11 vel khan Lengpui tumhmun atangin Raj Bhavan a rawn thleng a, Raj Bhavan official-te'n an lo hmuak a. Inrinni kal ta a North Eastern Council plenary session hmanga Agartala a a kal kha hunpui chhung chawl turin an khaw lamah kalin kum thar hnu-a lokir leh tura a inruahman lai-in Odhisa larsap a ban tak avang leh a ai-awh tura President-in a ruat tak avangin a chawlh hun kai tawi-in Mizoramah a lokir leh a. Kar leh Thawhtanni emaw khian Aizawl a chhuahsan leh dawn ni a hriat a ni a, Bhubaneswar Raj Bhavan lamah a insuan lut nghal tura ngaih a ni.

Puan tawh angin Odhisa larsap Raghubar Das banna President Droupadi Murmu-i'n a pawm tak avangin state thenkhat a larsapte awmna siksawi a ni a. Mizoram larsap thar atan General Vijay Kumar Singh chu a ruat a, Mizoram thenawm buaina nasa takin a tuam mek Manipur larsap atan union home secretary chawl ta Ajay Kumar Bhalla chu ruat a ni bawk.

Larsap thar tur, India ram sipai lal ber 24-na leh union minister of state ni a ministry pawimawh hrang hrang lo chelh tawh Gen. Vijay Kumar Singh hian engtikah nge Aizawl a rawn thlen dawn tih an la hriat rih loh thu Aizawl Raj Bhavan-a thawkte chuan an sawi a ni.

<><><>

LUNGLEI SEIZURE

District bawrhsap-in FIR a thehluh behchhanin Lunglei district Police te chuan halpuah leh a kaihnhawih Rs 9,000 hu vel an man.

Krismas lawmna boruak a zo a, nimin atang khan nun dan phung pangngai-in Lungleiah hun hman a ni a, Sorkar pisa pawh in hawngin Bank leh sumdawmna hrang hrang pawh an in hawng. Pisa kai erawh an tam lutuk lova, dawr inhawng bawk mahse mipui an tam lutuk lo. Halpuah ri hriat tur a awm loh bakah a hal man an awm lo. Hetihlai hian bawrsap Pi Navneed Mann-i'n FIR a thehluh bawhzui-in Police te'n RVL Store Chanmari atangin halpuah leh halmawi Rs 9,000 hu vel an man a. Dawr neitu hi BNS section 223(a) hmanga thubuai siamsak a ni a, thil awm dan chhuizui mek zel a ni.

Hetih lai hian nimin khan Lunglei district SP Pu Jerome Lalmuankima hovin a pisa-ah Lunglei khawpui chhunga Police Officer zawng zawngte kalkhawmin Krismas vuakveta an hnathawhte thlirletna hun an hmang a. Police Officer kal khawmte chuan an duty-na hmun theuh report pein Lunglei khawpui chhungah boruak duhawm lo leh harsatna thleng a awm loh thu an sawi a. SP chuan Police Officer kal khawmte hnenah kum hlui thlah zan leh kum thar inkarah pawh mipuite him zawk na'n khauh lehzualin tan la turin a fuih a. Traffic Police-te pawh rui chungah lirthei khalh leh mi dang tana hlauhawm khawpa lirthei khalhtute lakah dan angin hma la turin a tih bakah; two wheeler silencer/exhaust ring lutuk hmangtute chungah pawh dan angin hma la turin a hrilh. Mipuite chu kum hlui thlah zanah halpuah leh halmawi hal lo turin a ngen a, sorkar thupek bawhchhia a hal luite chu an chungah dan angin hmalak a nih tur thu a sawi bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chawhnu dar 2 leh a chanve-ah Chanchinthar puan leh a ni ang.

<><><>

PROTECTED AREA REGIME

Ministry of Home Affairs chuan venhim ngai bik state a ramdangmite luh chungchangah nimin khan Mizoram leh state dang pahnihte biak-hmuh-theih hmangin sawihona a buatsaih.

Home department hotute'n an sawi danin Ministry of Home Affairs (MHA) hotute nena biak-hmuh-theih hmanga an inkawmna-ah hian tun hnai a Myanmar ramri hnaih state 3, Manipur, Mizoram leh Nagaland home department hotute an tel a. He'ng state pathuma kum 14 zet ramdangmi luh khuahkhirhna phelh a nih tawh hnu a, tun hnai a, khuahkhirhna kalpui leh tura tih a nih tak avanga sawiho an ni. MHA hotute chuan Myanmar ramri a awm Mizoram, Manipur leh Nagaland a lut tur ramdangmite chuan e-Foreigners Regional Registration Office (e-frro) portal-ah a bika luh phalna Restricted Area Permit (RAP) leh Protected Area Permit (PAP) te chu online a dil tur a nih thu an sawi a. Hemi chungchang leh a kalpui dan tur hi home department hotute chu sawipui-in an hrilhfiah a ni.

Ramdangmi lo lutte khuahkhirhna hlih a nih hma khan Mizoramah chuan ramdangmite'n a bik taka phalna an neih lo buaipuisak turin home department, SP, CID (Special Branch) leh district SP te chu ruat an ni thin a. Tuna hetianga khuahkhirh a nih leh dawn takah pawh hian a ngai ang bawka a buaipuitu ngaite

hman leh phawt a nih tur thu home department hotute chuan an sawi a. Kum thar tirah hian helama mawhphur turte pual hian training buatsaih a nih tur thu an sawi bawk a ni.

Kar kal ta Thawhlejni khan MHA hian Manipur, Mizoram leh Nagaland chief secretary-te hnenah lehkha thawnin an state a ramdangmite an luh dawnin RAP leh PAP an neih a ngai leh dawn tih a hriattir a. Kum 2010 atanga hlih rih, he khuahkhirhna tuai thar leh a nih chhan hi ramdangmite'n he'ng state-ah te hian buaina an chawhchhuah hlauhthawn vang niin an sawi. RAP leh PAP neih hmasa tura tihna hi Foreigners (Protected Areas) Order, 1958 hmanga kenkawh thin a ni a, tuna thlah zalen hi December, 2027 thleng a ni chungin sorkar laipui chuan a rawn thar thawh leh ta thut a ni.

<><><>

LAST RITES OF DR. SINGH

Prime Minister hlui Dr. Manmohan Singh-a ruang chuan vawiin hian a zin kawng hnunung ber a zawh dawn.

Dr Manmohan Singh ruang hi zing karah hian Delhi a a chenna in atangin Congress party hmunpui-ah lak a ni anga, hetah hian party mite leh mipui nawlpui-in an zahna leh uizia an lantir thei dawn a. Congress party hmunpui atang hian a ruang halralna tur Nigambodh Ghat hmun panin zing dar 9:30-ah kalpui a ni ang a. Chawhma dar 11:45-ah sorkar chawimawina sang bera vuina hun (state funeral) hman a ni ang.

Dr. Manmohan Singh hi ni 7 chhung, January ni 1 thlengin sun a ni dawn a. Hemi hun chhung hian hnam puanzar chu a ngun chanve-ah zar a ni a, ram chhung bakah ramdanga India palaite awmna zawng zawngah pawh hnam puanzar hi a ngul chanve a zar a ni. Vawiin chawhma hi sorkar laipui leh a hnuai a pisa dang zawng zawng chawlhah puan a ni.

Union Cabinet chuan Prime Minister hlui an sun thu sawiin mi ropui, economist hlun leh hruaitu ropui chu India in a chan ta a ni an ti a. Minute hnih ngawi reingin a sunna atan an ding bawk a. A bik takin kum 1991 leh 1996 inkar chhunga Union finance minister a nih chhunga ram ei leh bar dinhmun a siamthat chu hriat reng a ni dawn a ni, an ti a ni.

<><><>